

दिनांक 04.08.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- मुख्यमंत्री भजनलाल शर्मा कह्यो-समाज रा सगळा वर्गा रा उत्थान ऊं ई विकसित राजस्थान रो सपनो साकार व्हेला ।
- प्रदेश मांय 7 अगस्त ने हरियाली तीज माथे अमृत पर्यावरण महोत्सव रे तैत एक ई दिन मांय लगाया जायेला एक करोड़ ऊं बत्ती पौधा ।
- पेरिस ओलंपिक मांय भारत हॉकी रा क्वार्टर फाइनल मुकाबला मांय ग्रेट-ब्रिटेन ने हरा र सेमीफाइनल मांय व्हयो दाखिल ।

अर

- प्रदेश मांय न्यारी-न्यारी ठौड़ां मॉनसूनी बिरखा रो दौर चाले-जयपुर, कोटा, भरतपुर, अजमेर अर उदयपुर संभागां मांय आज अर काले घणकरी ठौड़ां बिरखा री आस ।

000

मुख्यमंत्री भजनलाल शर्मा कह्यो है के समाज रा सगळा तबगा रा उत्थान ऊं ई विकसित राजस्थान रो सपनो साकार व्हे सके है । ई सारू राज्य सरकार कर्मचारियां अर पेंशनधारियां रा हितां ने ध्यान मांय राखता बजट मांय केई प्रस्ताव कर्या है । श्री शर्मा आज मुख्यमंत्री रहवास माथे राज्य कर्मचारियां अर पेंशनधारियां सारू बजट ऐलाना माथे धन्यवाद सभा मांय बोल रह्या हा । वणा कह्यो के कर्मचारियां अर वां रा परिवार रा हिता सारू राज्य सरकार वचनबद्ध है । मुख्यमंत्री कह्यो के ऐलान बगतसर पूरा व्हेता ई संबंधित तबगा ने उण रो फायदो मिले है । ई सारू आप री सरकार कर्मचारी हित मांय बिना देरी कर्या कुछ ई मीना मांय केई महताऊं फैसला लिया है ।

000

प्रदेश मांय मॉनसून रे दौरान न्यारी-न्यारी ठौड़ां पौध रोपण कर्यो जावे । अलवर शहर रा भूरासिद्ध रा हनुमान मंदिर मांय एक पेड़ मां के नाम' अभियान रे तैत आज केन्द्रीय पर्यावरण मंत्री भूपेंद्र यादव अर राज्य रा वन मंत्री संजय शर्मा पौध रोपण कर्यो । ई हलकां मांय कोई 20 हजार पेड़ लगा र मातृवन विकसित कर्यो जायेला । ई मौके श्री यादव कह्यो के शहर रा द्वार कटीघाटी माथे 70 हैक्टेयर मांय नगर वन अर बायोलॉजिकल पार्क बणा र शहर ने हरयो भरयो बणावण रो काम कर्यो जावे । वणा लोगां ऊं पेड़ लगावण अर वां री देखभाळ करण री अरज करी । उठिने सांचौर री

सरवाणा अर मेडाजागीर ग्राम पंचायतां मांय गांवा वाळा मुख्यमंत्री पौधरोपण महाअभियान कार्यक्रम रे तैत मानव श्रृंखला बणायी। ई मौके पौध रोपण कर ने बत्ती ऊं बत्ती पेड लगावण सारू प्रेरित करी ज्या। पाली रा बांगड सरकारी कॉलेज मांय मांय पौधा रोपण अभियान रे तैत पांच हजार पौधा लगायी ज्या। भारतीय स्टेट बैंक अर दूजी निजू संस्थावां कानी ऊं व्ह्या ई पौधा रोपण कार्यक्रम मांय जिला कलेक्टर एल.एन मंत्री अर पुलिस अधीक्षक चुनाराम जाट ई मौजूद रह्या। ई मौके टॉबरा नाटक री मार्फत पेड बचावण रो संदेश दियो। झुन्झुनू जिला रा झेरली गांव मांय सिंगल यूज प्लास्टिक रा कूप्रभावां रा बारा मांय जाग जगावण सारू प्लास्टिक फ्री ग्राम पंचायत अभियान सरू करी ज्यो। ई कड़ी मांय स्कूली पढेसरां पोस्टर बणावण, भाषण अर स्लोगन रे साथै-साथै नुक्कड़ नाटक री मार्फत सिंगल यूज प्लास्टिक रा कूप्रभावा रा बारा माय बताया।

000

प्रदेश मांय आवती सात अगस्त ने हरियाळी तीज रे मौके शिक्षा अर पंचायती राज महकमो एक दिन मांय एक करोड़ पौधा लगावेला। शिक्षा अर पंचायतीराज मंत्री मदन दिलावर बतायो के मुख्यमंत्री भजन लाल शर्मा री प्रेरणा ऊं अमृत पर्यावरण महोत्सव रे तैत राज्यभर मांय लोगां री मदद ऊं ई दिन पौध रोपण कर्यो जायेला। वणा कह्यो के पौधा री जनभागीदारी ऊं देखभाळ करी जायेला जिण ऊं तपती धरती रा बधता तापमान ऊं आराम मिल सके। श्री दिलावर बतायो के ई सारू सगळा बन्दोवस्त करी ज्या है। स्कूलां मांय पौध रोपण री गतिविधियां सारू यूथ एण्ड ईको क्लब री मार्फत 37 करोड़ रूप्या रो बजट दीरीज्यो है। लारला तीन मीना ऊं बरोबर प्रदेश रो सगन दौरा कर ने लोगां ने पौध रोपण री मुहीम ऊं जोड़ण री कोशिश करी जाय री है। वणा कह्यो के शिक्षा अर पंचायती राज महकमो तैय कर्यो है के सरकारी अर निजू स्कूलां समेत सगळा अहलकार अर कर्मचारी री ई अभियान मांय सक्रिय भागीदारी रहवेला। श्री दिलावर कह्यो के पैली ऊं 12 वीं क्लास ताई रा सगळा पढेसर इतरा पौधा लगावेला जितरा उण रा पिरवार मांय सदस्य है। औसतन कम ऊं कम 5 पौधा हर पढेसर ने लगावणा व्हेला। कार्य योजना मुजब तीजा दर्जा रा अध्यापक कम ऊं कम 5, सैकेण्ड ग्रेड रा अध्यापक दस पौधा अर फर्स्ट ग्रेड रा अध्यापक कम ऊं कम 15 पौधा लगावेला। अ पौधा सरकारी अर प्राईवेट स्कूलां, गौचर, सरकारी जमीन अर गांव रा सार्वजनिक ठौड़ां माथे लगाया जायेला। वृक्षारोपण अभियान सारू कुछ खास हस्तियां ने ब्राण्ड एम्बेसडर ई बणायी ज्या है। 200 पौधा लगावण माथे पौधा री हिफाजत अर रख रखाव सारू एक नरेगा मजूर ने नियुक्त कर्यो जायेला।

000

पेरिस ओलंपिक मांय भारत ग्रेट ब्रिटेन ने हॉकी मांय आज खेली ज्या क्वार्टर फाइनल मैच मांय 2 रे मुकाबले 4 गोळ ऊं हरा र सेमीफाइनल मांय दाखिल व्हे ग्यो है। तैय 60 मिनट रा बगत ताई दोन्यू टीमां एक-एक गोळ कर ने बराबरी माथे री। इण रे पछे शूटआउट री मार्फत जीतण वाळी टीम रो फैसलो व्हयो। शूटआउट मांय भारत आप रा चार निशाणा साध्या, जद के ग्रेट-ब्रिटेन दो निशाणा लगा पायो।

लारला टोक्यो ओलंपिक मांय कांसी रो तमगो जीतण वाळो भारत ई बार ई आप रा तमगा री आस बणाया राख्यी है।

000

प्रदेश मांय आज हरियाळी मावस मनायी जावे। ई मौके पितर तरपण समेत केई धार्मिक कार्यक्रम अर दान-पुण्य करया जावे। राजधानी जयपुर रा मोती डूंगरी गणेश

मिंदर मांय रवि पुष्य नक्षत्र मांय गणपति रो पंचामृत अभिषेक करी ज्यो। भीलवाड़ा रा बिजोलिया हलका मांय तिलस्वा महादेव मिंदर मांय आज ऊं मेळो भरीजे। म्हाणा खबरनवीस बतायो के जिला मांय शिव मन्दिरां मांय खास पूजा-अर्चना करी जावे।

जोधपुर जिला रा पीपाड़ नंदी गौशाला मांय ई मौके एक सौ एक पौधा लगाया जावे साथै ई साथिन ग्राम पंचायत मांय 51 पौधा अर ट्री गार्ड लगा र संरक्षण री जिम्मेदारी लीरीजी है। भरतपुर मांय बांके बिहारी मिंदर मांय ठाकुर जी रो खास सिणगार अर पूजा अर्चना करी ज्यी। सिरधालुआं गोवर्धन धाम री सात कोस री परिक्रमा ई दी। बीकानेर मांय पेड़ां री पूजा रे साथे-साथे पवित्र सरोवरां मांय स्नान करी ज्यो। जैसलमेर मांय तीर्थ स्थली वैशाखी मांय भूतेश्वर महादेव री खास पूजा करी ज्यी अर सहस्त्रघट व्हयो। सर्वाईमाधोपुर मिंदरा मांय अनुष्ठान रे साथै ई रीत मुजब शहर मांय पतंगबाजी करी जावे। पाली मांय शिव मंदिरां मांय खास अभिषेक रे साथे पीपल री पूजा अर दान पुण्य करी ज्या। सांचौर जिला मांय धमाणा रा गोलियां मांय अमृता देवी बिश्नोई गौशाला मांय हवन करी ज्यो। हनुमानगढ़ जिला मांय ई हरियाली मावस माथे केई कार्यक्रम कर्या जावे।

000

राज्यपाल हरिभाऊ किसनराव बागड़े आज संवारा नुवी दिल्ली मांय राजघाट माथे राष्ट्रपिता महात्मा गांधी ने पुष्पांजलि अरपण करी। राज्यपाल देश सारू प्राण निष्ठावर करण वाळा सरधा रा फूल अर्पण कर ने नमन कर्यो। पछे श्री बागड़े पैली रा प्रधानमंत्री अटल बिहारी वाजपेयी री 'सदैव अटल' समाधि माथे सिरधा रा फूल अर्पण कर्यो। वठे ई राज्यपाल रक्षा मंत्री राजनाथ सिंह ऊं मिल्या। ई दौरान राज्यपाल न्यारा-न्यारा मुद्दा माथे चर्चा करी।

000

प्रदेश मांय न्यारी-न्यारी ठौड़ां मॉनसूनी बिरखा रो दौर चाले। लारला 24 घंटा मांय कुछेक ठौड़ां भारी बिरखा व्ही है। वठे ई केई ठौड़ां हळका ऊं मझला दर्जा री बिरखा दर्ज करी ज्यी है। मौसम मेहकमा मुजब सब ऊं बत्ती 10 सेंटीमीटर बिरखा अजमेर रा अराई मांय व्ही। झालावाड जिला मांय संवारा ऊं ई हळकी बिरखा व्हे री है। न्यारा-न्यारा हलका मांय व्हे री चोखी बिरखा रे कारण जिला री सगळी नदियां पूरा बहाव माथे है। कालीसिंध बन्धां रा दो गेट खोल ने 7 हजार 800 क्यूसेक पाणी री निकासी करी जाय री है। वठे ई कोटा मांय पार्वती नदी री पुळिया माथे कोई 8 फीट पाणी री चादर चाल री है। बालोतरा जिला रा बुडीवाड़ां गांव मांय एक बरसाती नाळा मांय बण्या खाड्डा मांय डूब जावण ऊं तीन टोंबरा री मौत व्हे ग्यी। भीलवाड़ा शहर समेत गांवाई हलका मांय रिमझिम बिरखा रा दौर चाले। जैसलमेर जिला मांय लगातार दो दिन व्ही भारी बिरखा रे पछे आज ई केई ठौड़ां हळकी बिरखा रो दौर चाले। और ब्यौरा म्हाणा खबरनवीसा ऊं -

मौसम केन्द्र जयपुर रा निदेशक राधेश्याम शर्मा बतायो के आज अर काले जयपुर, कोटा, भरतपुर, अजमेर अर उदयपुर संभागां मांय घणकरी ठौड़ां माथे बिरखा होवण री आस है।

मौसम विभाग ने आज और कल जयपुर, कोटा, भरतपुर, अजमेर और उदयपुर संभागों में अधिकांश स्थानों पर बारिश होने की संभावना जताई है।

000

प्रदेशभर मांय बिजली रा प्रीपेड मीटर लगावण री योजना सरू करी जाय री है। उपभोक्तावां ने पैला रिचार्ज करणो व्हेला अर रिचार्ज खतम होव तांई बिजली री सप्लाई बंद व्हे जायेला। खेती उपभोक्ता ई योजना ऊं बारे रहवेला। पैला चरण मांय 25 लाख स्मार्ट मीटर लगाया जायेला जो जो जयपुर, जोधपुर अर अजमेर डिस्कॉम हलकां मांय थापित व्हेला। ई प्रोजेक्ट माथे कुल 10 हजार करोड़ रूप्या खर्च व्हेला, जिण मांय केन्द्र सरकार 15 फीसदी अर राज्य सरकार 85 फीसदी खर्च उठावेला ।